

Pitgpetg pervi dal preventiv ha cumenzà

Las chombras federalas s'occupan dal budget per l'onn proxim

■ (anr/sda/vi) La dretga less spargnar tar il persunal e tar l'agid social per asilants. Ils sanesters sa doston encunter tals plans. Ier ha cumenzà en il cussegl naziunal la debatta davart il preventiv ch'occupescha las duas chombras federalas fin l'ultima emna da sessiun. La regenza preveda per il 2019 expensas da 72,296 milliardas ed entradas da 73,556 milliardas cun in surpli dad 1,260 milliardas. Cumprids en questas cifras èn ils supplements dal 2018. La cumissiun dal cussegl naziunal propona sut il stritg respargns da 70 milliuns francs.

Spargnar 45 milliuns tar asilants

Pertutgant respargns tar fugitivs è il cussegl naziunal suandà ier sia cumissiun. Cun 105 cunter 85 vuschs ha el decidì da stritgar 45 milliuns francs tar l'agid social per fugitivs che dastgan star mo ad interim en Svizra. La maioritad ha argumentà ch'i na dettia betg pli tantas dumondas d'asil.

La pps ha giavischà ulteriurs respargns tar asilants, per exempel 61 milliuns tar ils centers federals per requirents d'asil. Tut las autras fracziuns èn dentant suandadas il minister da finanzas Ueli Maurer ch'ha admonì che las proceduras d'asil na possian betg vegnir acceleradas sco planisà sch'i manchian las finanzas.



Il minister da finanzas cusseglier federal Ueli Maurer ha preschentà in preventiv che quinta per 2019 cun in avanzament dad 1,26 milliardas.

KEYSTONE

Era la proposta da la pps da scursanir 78 milliuns en il departament da l'ester ha fatg naufragi – malgrà il sustegniment da la pld – cun 97 cunter 91 vuschs.

Naginas scursaniziuns tar il persunal Da spargnar 50 milliuns tar il persunal federal ha il cussegl naziunal era refusà, numnadamain cun 118 cunter 73 vuschs. I sa tractia d'ina proposta moderada, ha

Franz Grüter da la pps defendì la proposta da sia fracziun. Ils custs da persunal creschian era cun la scursaniziun anc per 37 milliuns. Singuls commembers da la pld han sustegnì la proposta. Ma la maioritad

è suandada il minister da finanzas ch'ha avertì ch'i dettia dapi trais onns in plafoament da persunal. Varsaquantas plazzas ch'il parlament haja decidì per novas incumbensas vegnian cumpensadas en ils departaments: Per las 350 plazzas ch'i bagegnia l'onn proxim – per exempel per proceduras d'asil acceleradas, per vias surpigliadas dals chantuns u per la strategia d'energia – dumondian ins il parlament uss be 170 novas plazzas, ha Maurer explitgà. En tut summan ils custs da persunal sin 5,8 milliardas francs.

Dapli per guardia da cunfin?

Oz e damaun èsi da spetgar ulteriuras debattas chaliradas davart detagls dal preventiv. En vista è plinavant ina soluziun per las miserias da persunal tar la guardia da cunfin. Il problem è enconuscent gia daditg e tuttina ha il parlament refusà ils ultims onns pliras intervenziuns per dapli daners per la guardia da cunfin. Uss propona la cumissiun da finanzas d'augmentar il budget per 2,8 milliuns francs, uschia ch'ins pudess stgaffir 44 novas plazzas en il corps da la guardia da cunfin. La maioritad da la cumissiun giavischa dentant che la confederaziun cumpenseschia questa summa insanu'ater. Ina minoritad da la sanestra ed ils verds vulan desister d'ina cumpensaziun. In'ulteriura minoritad da l'ala burgaisa na vul nagin augment finanziaal per la guardia da cunfin.